

پولس و اگرده به انطاکیه

۱۸ پولس ایتاً مدت قُرُنُسْ میان بیسه. بزین ایماندارانِ امرأ خوداحافظی بوکوده و پُریسکیلا و آکیلا امرأ جَه دریا راه بوشو سوریه. اون کنخریه میان فارسه، چونکی خو امرأ عهد دَوَسْتَه بو به خودا نزدیکتر ببه، خو سرّ موی بتراشته. ۱۹ وختی پولس خو همسفران، پُریسکیلا و آکیلا امرأ به افسس فارسه بیدی، اوشان ترک کوده، خودش بوشو کنیسه میان کی یهودیانِ امرأ گب بزنه. ۲۰ یهودیان اون جَا خواهش بوکودیدی ایتاً پیچه ویشتر اوشان ورجه بیسه ولی پولس قوبیل نوکوده. ۲۱ اوشانِ امرأ خوداحافظی بوکوده، بوگفته: «اگه خودا اراده ببه، و اگردم ایم شیمی ورجه.» بزین کشتی سوار بوسته و افسس ترک کوده. ۲۲ قیصریه کی فارسه، جَه کشتی بیجیر بَمو، بوشو اورشلیم کلیسا ایمانداران بیدینه و جَه اویه بوشو به انطاکیه. ۲۳ چند روزی اویه بیسه و دوواره راه دکفته و سرتاسر غلاطیه و همهی مناطق فریجیهی دوارستی و توماّم ایمانداران او منطقهی تقویت روحانی کودی.

۲۴ او روزان، ایتاً یهودی مردای کی اسکندریه شین بو و آپولس نام داشتی بَمو به افسس. اون ایتاً ماهر سخنور بو و جَه خودا کلام خیلی دانستی. ۲۵ آپولس راه و روشی کی ایتاً مسیحی و ابدانسته بی، تعلیم بیده بو و روح القدس هدایت امرأ گب زهیی. دقت امرأ در مورد عیسای خوداوند تعلیم دبی، هر چند کی فقط جَه یحیی تعمید آگاهی داشتی. ۲۶ اون شجاعت امرأ کنیسه میان مردومان ره بشارت

دیی، ولی وختی پُریسکیلا و آکیلا اون گبان بيشنوستید، اون خوشان خانہ برديد
تا خودا کلام بهتر اون یاد بدید.

۲۷ چون آپولس تصمیم بیگفته کی به آخائیه سفر بوکونه، ایمانداران افسس، اون
تشویق بوکودیدی و اوشان ایمانداران او منطقه ره نامه بینویشتیدی کی اون جا به
گرمی پذیرایی بوکونید. وختی آپولس اویه فارسه، اوشانی کی به واسطه خودا
فیض ایمان باورده بید خیلی کومک بوکوده، ۲۸ چونکی همه تان ورجه، یهودیان امرأ
گفتگو کودی، اوشان عقاید، دلایل قوی امرأ رد کودی و کیتاب مقدس امرأ ثابت
کودی کی عیسی، هو مسیح ایسه.